

求恕齋  
叢書

雪橋詩話三集

四



卷之三



雪橋詩話三集卷第四

遼陽楊鍾義撰集

吳興劉承幹參校

素庵太僕索芬性愛竹其友黃尊古自江南買竹數千竿以船載入京師王石谷爲作載竹圖卷時爲康熙戊寅四月至乾隆戊寅歸益齋主人卷中有李鐵君沈歸愚題詠道光初爲李春湖所得吳蘭雪賦詩有云林榭荒涼二百年檀櫈相對尙依然借山題句飄零盡只記霜鐘落枕圓五字爲詩僧借山句事見鐵君記中也

常熟汪東山修撰書法類趙文敏臚唱日有歸計未謀

千畝竹浮生只辦十年官之句明端範相國嘗令其推  
算八字置不答分校得查初白屈培基題其秋影樓集  
所謂拔得東坡足千古平生愛士繼歐陽者也癸未假  
歸乙酉校刊全唐詩於揚州未幾卒詩如寄庭仙云秋  
風鱸膾江南味春雨梅花處士魂梅花樓訪月溪上人  
云斜陽影裏看歸鳥落葉聲中著病身陳雪川同年桐  
廬署齋云青草暗生公座下白鷗時到縣門前沈鱣溪  
謂其切磋于邵陵而秀骨天然不似邵陵之眞而近俚  
也

東陽李梧岡鳳雛執贊于毛大可之門論春秋策書按

時度物于三家是非多所考駁著春秋紀傳五十一卷  
貢入太學試瀛臺觀荷詩拔第一出宰曲江一年落職  
發五仙驛爲徒因自號仙驛狂徒曾以琴贈朱菊山菊  
山卒輓以詩云江東詩好誰如爾天上樓成只爲渠又  
云當年綠綺猶存否子敬人琴兩絕聲菊山名慎武義  
明經亦振奇人也

韓城劉喬南中丞蔭樞丙辰進士初授蘭陽令癸酉以  
最擢刑科給事中章數十上三十五年疏言自古厲廉  
止貪必從節儉未有奢侈之人而能節已愛民者近來  
官吏競爲侈靡不特僭制踰等抑且交接奔走餽送貴

緣常俸不給則稱貸於人致債主凌轢辱詈玷官箴而  
辱國體京師放債之人六七當十半年不償卽行轉票  
以利爲本數年之間累萬盈千卽蕩家碎身終難清償  
祈赦嚴立科條違者懲治俱下部議行外轉贛南道罷  
歸癸未西巡迎駕 聖祖指曰此劉鬍子胡不官服卽  
日起用四十七年擢貴州巡撫丙申策妄阿刺布坦擾  
哈密大軍北征喬南念黔疆瘠薄不能助餉年且八十  
具疏乞休因密奏重內治勿勤遠請息怒慎用人核名  
實重國本疏中有進說於英主與進說於庸主不同與  
庸主言非發露其詳不可與英主言則引其端而已悟

皇上英主也臣愚敢以六事進且云在廷諫阻無人臣老且死不能不言極切直得旨劉某雖老尙能騎馬著馳赴軍前周閱議奏許謹齋感興云萬里馳書諫用兵廟謀乾斷幾人明迂疏漫說干英主垂老鋒車絕塞行軍屯遠關金城外玉斧遙揮大渡西安得張騫傳介子真將馬革換雞栖詠其事也喬南卽日就道抵巴里坤疏請增屯轉餉意在屯哈密以東以逸待勞嚴旨切責尋念其在貴州時官民說好仍令撫黔謹齋詩云長驅萬里赴雄邊白髮書生已耄年帶甲連營冰雪裏更煩增寵議屯田瀚海飛沙水草空雞皮凍損雪山風廟堂

自有平戎策垂死憂天笑此翁甲仗旌旗隕雪霜飛芻  
輓粟說贏糧夏蟲不到天山外曾見冰堅八尺強八十  
文淵困據鞍玉門生入請休官虛言無實空成笑不殺  
依然漢法寬赴黔半載復發往西邊種地在喀爾喀者  
四年乃賜環復職留京六十一年預千叟宴有批鱗直  
諫之褒雍正元年賜金歸里卒年八十有七喬南偉軀  
幹美須丹耄年好學自號秉燭子其彊直至老不衰可  
謂不負所學世宗召見謂卿先帝老臣朕欲用汝  
以年太老召其子熾扶掖而出拜御硯朝珠之賜當時  
榮之滇人趙我軒紀其治行甚詳不具錄

費滋衡說詩謂孟襄陽詩古今學之者甚眾然最難工學其澹虛薄而不厚學其清慮靡而不古學其自然慮常而近俚學其緩慮曼而入于弱故以高蘇門宋鷺池曹能始邢孟貞陳元孝之才華詣力學之終身且不逮吾涵泳襄陽近而求之古人乃悟嗣宗靖節爲其所自然而楚詞之九歌尤爲鼻祖學襄陽不本于九歌阮陶是謂不知本若韋蘇州柳子厚知不能與襄陽爭衡而別加幽奧覩深韋柳不得不爾也爲襄陽者不能上追九歌阮陶則當于襄陽別有所變易如韋柳之用意是又一道也見貫道堂文集其詩曰擊鯨堂集臨淮云四鎮

分屯日臨淮舊有名千秋龍種地十里鳳陽城草綠彈  
箏浦雲寒牧馬營婦人歌古調半是楚遺聲入洧川山  
居云午辭卓茂廟晚入一郵孤山店寒懸兔野船秋渡  
驢橋危橫板折龕破老僧枯借問當鑪婦廚中有火無  
爲客云隨身齎鏡具自給賃春錢複壁藏張儉悲歌和  
魯連藥成將度世書就有編年爲弔襄陽叟留詩漢水  
邊海邨雜詠云海樓秋易夕水寺晝長昏穀貴難成市  
時荒早閉門蛇龍各自媚禮樂不言尊寄閼西邨叟方  
飢劙草根均有自得之趣漁洋稱其尊人此度白馬巖  
中出黃牛壁上畊鳥聲下楊柳人語出菰蒲及大江流

漢水孤艇接殘春等句滋衡實堪繼武其論張江陵謂  
其用潘季馴治河用戚繼光李成梁俞大猷禦邊用曾  
省吾劉顯平都蠻收養把漢那吉而俺達入貢命一介  
取黔國公沐國弼而黔國不敢不至太倉之粟可支十  
年太僕積儲至四百萬惜乎能治國而不能安人嚴法  
度而鮮禮讓不終喪制臺垣糾之不能引罪自責子嗣  
修懋修皆及第不能遠嫌侵遼王妃府不能戢下折毀  
天下書院使清流藉口此怨毒所由生謗毀之所由致  
當江陵爲相時使用其勢以肥家雖敵國無難及其籍  
沒也家貲不及嚴嵩二十之一亦可知其公且廉矣繼

江陵爲政者憲江陵之敗多謙退減默以苟免因循積  
弊以至崇禎遂亡天下持論最爲平允李客山從問詩  
法告以無逐時趨毋甘美語習於人口者必吐之眾所  
不爲者勿畏之肫肫乎如雞之伏卵日月至矣必且轂  
出而鳴啄矣卽聽天下有不齊之論吾道誠是也必有  
知我者亦可謂工於立言

康熙乙亥厄魯特噶爾旦擾邊乾斷親征三十五年正  
月由中路前發命講學張廷瓛侍讀陳元龍隨行張文  
貞高江村胡孟綸亦請扈蹕禹典客爲文簡寫戎裝小  
照王石谷補景陳香泉題曰北征扈從圖韓慕廬詩

聖人神武絕大漠言陪雉尾插雞翹據鞍鞭弭金僕  
撲面霜花點孟勞行祕書從與樽俎第七車乘傍斗杓  
行過高山與深谷裁出蟠螭又雞鹿絕塞飛禽不到處  
黃羊白雀紛追逐瑩確沙行寸土無善達賽爾泉流玉  
茫茫瀚海石粼粼丹砂的礫光銀燭經冬氣候江南春  
渾脫輕裘訝偏燠一夜冰堅似滹沱渡河不用嗟獨漉  
郁爾蘇離草復佳勝於茸母饒苜蓿蒲萄結實何纂纂  
蒂下小鎖垂簏箥善達者地窪而潤掘未二尺卽及泉  
賽爾者山閒溝徑掘尺許卽及泉郁爾呼草牛羊駝馬  
食之最宜蘇離亦草名也是年徐芝仙從古香主人出

塞倩黃尊古作青塚圖塚旁石虎背青塚二字並墨拓  
裝入卷中宋藥洲閣學以編修充日講官奉命督中路  
運糧事石谷亦爲作北征圖是役自出師以至凱旋爲  
時八十日西路大將軍費揚古孫思克等大敗厄魯特  
於召磨多斬馘三千有餘俘獲無算于振甲時督餉奏  
請凡安插奉天者許令捐馬效力收回原籍皆輸輓捐  
助踊躍從征吳青壇詩偏師已過託羅海黃幄遙臨拖  
納山蓋度塞三千餘里也何吟秋詩親征噶爾丹勒銘  
昭莫多山欲城兮無駱駝俘有老胡上令笳歌黃河北  
柰若何北斗南柰若何噶爾旦旣竄命將式遏且示招

來是冬復以餘黨未靖駐蹕塞上降者日眾次年春復發京師抵寧夏哈密効力禽其子色不騰巴爾朱爾送行在大軍進次于狼居胥山其族台吉濟農等輸順請朝貢噶爾旦飲藥自殺其部落輿尸乞命以其男女三百口來歸當夫天心一怒廟略三驅銳意攘除爲民除害一年之間戎衣弓矢數歷奇勞其經畫形勢控扼險要無非親臨指授者焉

譚復堂謂沈適聲倚聲柔麗探源淮海方回所謂層臺緩步高謝風塵有竟體芳蘭之妙適聲仁和諸生學於沈去矜有蘭思詞詩如西湖竹枝詞云兩峰對壓兩湖

欹隨分登樓幾賦詩小艇呼來纔擺岸竹絲穿賣小魚兒亦可見其風致

鄆都漢平都縣有平都山道書七十二福地之一王方平得道於此陰長生亦於此成仙地志誤稱爲陰君上昇世俗遂指爲鬼窟祝枝山語怪復備載永樂閒尤令事相沿成俗有請牒于官爲先靈覓路者陳成永送王文在之鄆都令詩謂異時倘得題請更名平都庶可祛愚民之惑亦君子反經之一道也

康熙中詔選宋金元明四朝詩華亭王雲岡以南巡獻詩與內廷纂書之役壬辰與王麟照詹事同賜翰林其

從祖王棫唐王時守建昌城破殉節乾隆丙申蒙謚節  
愍而康熙丙子己詔史館勿諱彰前勞闡幽發潛聖朝事啟公衣  
冠出舊笥之句我朝崇獎忠貞前代所未有也麟照爲  
璫湖相國子詩入江左十五子詩選平原村云年少驚  
人入洛名雲津龍躍是平生入王兵甲無臣主兩晉文  
章有弟兄晚節不堪愁鶴唳舊交聞已賦尊羹春蒲細  
柳平原路長使行人淚滿纓雲岡嘗移居古藤書屋爲  
金文通舊第麟照寓爛麪胡同不喜酬應改爲懶眠亦  
可入京師坊巷考